

Please address all correspondence
To the Chief Executive Officer

In reply, please quote the file reference



File ref:

GOVERNMENT OF SAMOA

MINISTRY OF FINANCE

PEPA O FAAMATALAGA

FA'ALAUILOAINA ALOA'IA O LE TA'IALA MO LE LUMANA'I MANUIA O SAMOA TF2026/27 – TF2030/31

Na fa'alauiloaina aloa'ia e le Afioga i le Ali'i Palemia ia La'aulialemalietoa Polata'ivao Leuatea Fosi Schmidt le **"Ta'iala mo le Lumana'i Manuia o Samoa (TLMS)"** mo le tausaga fa'aletupe 2026/27 se'ia o'o atu i le 2030/31, i le Aso Gafua 8 o Iuni 2026 i le **Tui Atua Tupua Tamasese Efi (TATTE) Convention Centre** i Sogi. O lea fa'amoemoe o se taunu'uga tāua mo le Mālō ma ana pa'aga uma, auā o lenei ta'iala o le a limata'ita'iina ai le atiina'e ma le lumana'i manuia o Samoa mo le isi lima tausaga o i luma.

I lana saunoaga autū, na fa'ailoa ai e le Afioga i le Ali'i Palemia le tāua o le galulue so'oso'o tau'au o vaega uma o le atunu'u, auā o le atina'eina o le atunu'u, e lē o se matafaioi na'o le Mālō. O se galuega faifa'atasi a le Mālō, o nu'u ma alalafaga, o le vaega tūmaoti, ma tagatānu'u uma o Samoa. O nei taunu'uga e taula'i uma i le sini autū e fa'apea, ia **"Fa'amausalī le atina'ega o nu'u ma alalafaga, fa'atautaia atina'e mautū ma una'ia pūlega lelei, o avanoa tutusa ma le galulue fa'atasi fa'apa'aga"**, ma le fa'amoemoe ina ia ausia le va'aiga taula'i e fa'apea, **"O se Samoa e mauā'a lona Fa'avae i le Atua, ma lana aganu'u, e mafai ona ausia se tulaga mausalī, saogalemu ma manuia, mo ona tagatanu'u uma."**

Na ave le fa'amamafa a le Afioga i le Ali'i Palemia i le naunauta'iga a le Mālō e tali atu i lu'itau o lo'o feagai pea ma le atina'e o Samoa. O lo'o atagia lea i le fa'atāuaina o le tausiona o so'otaga fa'ale'āiga, o tū ma aga tausili aemaise le fa'avae mautū o le Aiga e fa'atonufofou ai le tatou savaliga.

E lima (5) Ta'iala Autū o lenei Ta'iala fou, e sefululua (12) Vaega Fa'amuamua, ma o lea mata'itūina i Fa'ailoilo ua uma ona fa'atūlaga ma Vaega Maoti eseese. O vaega fa'amuamua ma ta'unu'uga ua fuafuaina, e aofia ai le atina'ega o le soifuaga lautele – lea e fa'atāua ai le soifua mālōlōina, o a'oa'oga, le aganu'u ma le manuia lautele o tagata uma. O lo'o fa'aaau pea le fa'amuamua a le Mālō i le fausia o se tamāo'aiga gafataulimaina; e mautinoa ai o lo'o mautū le tūlaga o le tamāo'aiga, ma e maua e tagatānu'u uma le soifua manuia. O le a ave fo'i le fa'atāua i le fa'atuatua o pulega lelei, fa'amamaluina o tūlafono, ma le saogalēmū; ua atagia ai le fa'amoemoe ina ia tausiona e fa'alapotopotoga eseese aga tausili, ia malupuipua nu'u ma alalafaga ma ia maua e tagatānu'u Samoa uma avanoa tutusa i auunaga tau tūlafono ma filifiliga sa'oloto. O le a fa'atāua fo'i le malupuipua o le si'osi'omaga mai a'afiaga o suiga o le tau. Ona o le tūlaga ma'ale'ale o Samoa i suiga o le tau ma fa'alavelave fa'afuase'i, ua ave ai le fa'atāua i tūlaga mo'omia mo le malupuipua o le si'osi'omaga, le toe fa'aleleia o puna'oa fa'alēnatura, le fa'amalosia o tapenaga i nu'u ma alalafaga mo fa'alavelave tutupu fa'afuase'i, fa'apea le una'ia o malosiga fa'afouina. O lo'o tūmau fo'i le fa'atāua a le Mālō i le lelei fa'atūlaga o galuega tetele ma le gafataulimaina o ana atina'e; lea e aofia ai le tausiona lelei o aseta tetele a le Mālō, le fa'atinoga lelei atoatoa o auunaga lautele, ma le una'ia o suiga ma metotia fou fa'atekonolosi.

Sa fa'afetaia e le Afioga i le Ali'i Palemia le lagolagosua ma le fesoasoani a i latou uma na iai sō latou sao i le tapenaina o leni ta'iala. E aofia ai pa'aga o lo'o fai ma sui o nu'u ma afio'aga, le vaega tūma'oti, fa'alapotopotoga o nu'u ma afio'aga, pa'aga mai atunu'u i fafo, fa'atasi ai ma Matāgaluega ma Fa'alapotopotoga uma a le Mālō. Na ave fo'i le fa'amalosi'au e fa'aauuina pea le galulue so'oso'o tau'au o vaega uma, atoa ai ma le fa'amanatu i lō tatou tiute fai fa'atasi i le atiina'eina o se lumana'i manuia mo tagata uma o Samoa.

Sa auai i lea fa'amoemoe tāua sui o le Kapeneta ma le Palemene, pa'aga mai atunu'u i fafo, sui o vaega eseese o le Mālō ma le vaega tūma'oti, fa'apea ai ma sui o nu'u ma afio'aga.

O le a fa'aauau le fa'alauiloaina o le Ta'iala mo le Lumana'i Manuia o Samoa TF2026/27 – TF2030/31 i le vaiaso nei e pei ona fa'ailoa atu i lalo:

- **Aso Lua, 9 Iuni 2026 i le EFKS Hall, Fasito'o Tai i le 10 i le taeao;**
- **Aso Tofi, 11 Iuni 2026 i le Maketi i Salelologa, Savai'i i le 10 i le taeao; ma le**
- **Aso Faraile, 12 Iuni 2026 i le Fono Fa'avae i Sasina, Savai'i i le 10 i le taeao.**

END